


uniud.honsell



UNIVERSITÂT DAL FRIÛL IN VORE PAL GNÛF BANT DI CONCORS. CHEL CONTESTÂT AL JERE PE ASSUNZION DI UN AMINISTRATÎF

Cirf, in curt il bant pal puest di sportelist

Dute une altre storie dal bant scjadût ai 2 di Avrîl, che e veve scjadenât la proteste di 36 sporteliscj

A

Al centri de polemiche il bant di concors par un puest di lavôr al Cirf de Universitât dal Friûl.

ASPIRANTS SPORTELIST dal Cirf stêit tranquii. La Universitât di Udin e sta lavorant par preparâ un bant di concors di pueste, pe assunzion di un operadôr di sportel linguistic. Dute une altre storie di chel scjadût ai 2 di Avrîl, che e veve scjadenât la proteste dai interessâts potenziâi. Il messaç al rive diretmenti de direttore dal Centri interdipartimentâl di ricercje su la culture e la lenghe dal Friûl, Piera Rizzolatti, dopo vè vût sigurazions in mert dal retôr dal Ateneu furlan, Furio Honsell.

Par capî, fasìn un pas indaûr. Tancj a son aromai i ents locâi, soledut Commons, che a àn daviert in chescj agns ufizis e sportei pe lenghe furlane, ma ancje slovene e todescje, in grazie ai finanziaments de leç 482/99 su la tutela des minorancis linguistiche storiche e che, daspò cinc agns, a scjadin. A chel pont al è l'ent locâl che, crodint tal proget, al à di cjatâ lis risorsis che a permetaran di dâi continuitât.

Il prin ent a dovè frontâ la cuistion e je la Universitât di Udin, dulà che al è atif il Cirf. Ai 12 di Març stâts, sul sit

internet dal Ateneu, al è stât publicât il bant di concors pe assunzion di personâl li dal Cirf cuntun rapuart di lavôr subordenât di timp determinât. Chel test, crodint che al fos pensât pal puest di sportelist, al à fat saltâ sù 36 operadôrs di sportei, par vie di chei che chescj a àn let tant che vizis «formâi». «Nol permet – a àn dit intun comunicât – l'acès ae maiorance dai sporteliscj stes e al impedîs la pussibilitât di formâ une graduatorie di mert che, tai prossims agns, e podarès jessi doprade di ents tant che la Region, lis Provinciis di Udin, Gurize e Pordenon e la Agenzie regionâl pe lenghe furlane».

Il bant, di fat, tra i requisits, oltri ae richieste di une esperience, almancul semestrâl, tant che sportelist, ma cence specificâ la tipologjie, al domandave une cognossince oltri che de lenghe furlane ancje de lenghe francese e inglese. «Chest no dome al riscjje di no ricognossi la figure professionâl dal sportelist cussì come che e ven deliniade dal Vademecum dai sportei lin-

guistics, fat dal Silce e dal Consorzi universitari dal Friûl, ma ancje di fâ vgnû mancul i obietifs e i risultâts di politiche linguistiche di cheste region». Fuarts di cheste convinzion, cualchi sportelist al à presentât istès al protocol de Universitât, ai 2 di Avrîl, date di scjadince, la domande di partecipazion al bant di selezion, pûr no vint part o ducj dai requisits domandâts dal articul 2 dal bant (e cumò, e conferme Rizzolatti, «al sarà il diretôr amministratîf, Daniele Livon, a valutâ la amission des mandandis»). E prime ancjemò, ai 20 di Març, 36 operadôrs, no dome di lenghe furlane, a àn mandât al retôr de Universitât, Furio Honsell, une domande di revision e di gnove formulazion dal bant.

Si è tratât, duncje, a sintî Rizzolatti, di un malintindût. Il bant tant contestât al jere indreçât ae «selezione di un amministratîf cun competencis plurimis» e sclârîs. Il bant par assumi un sportelist al rivarà in curt, probabilitmenti drenti di cuindis, vincj dîs. E cun chest, «a rivaran ancje altris doi par assegnis di ricercje di consumâ achì dal Cirf». Azions, che a mostrin «la atenzion pai operadôrs di sportel e, in gjenerâl, par potenziâ lis struturis de Universitât che si ocupin di furlan».

ERIKA ADAMI